


CELEBRACIÓN EN OS COTOS

14-15 de xuño do 2025

FESTA DA SANTÍSIMA TRINDADE



Os COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,
E SEMPRE SEMENTANDO PAZ



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

♪ n° 3 *Unha xuntanza de amor*

Celebrante:

Imos comezar a nosa celebración facendo referencia ao gran misterio que nos presenta a liturxia deste día e que moitas veces, por rutina ou costume, non nos damos conta. Invocamos á Trindade, e por iso compartimos no nome do Pai e do Fillo e do Espírito Santo.

Dende o noso bautizo formamos parte da Igrexa e proclamamos ao Deus que comparte a nosa historia, o Deus que nos mostrou Xesús coa súa vida e que quere relacionarse con nós en todas as situacións nas que nos atopemos.

Un Deus-Pai-Nai que nos coida e agarima. Un Deus-Fillo-Irmán que está á nosa beira ensinándonos o camiño de amar e compartir coma irmáns. Un Deus-Espírito Santo que alenta no noso interior para formar parte da comunidade dos crentes.

Este único Deus invítanos agora a participar na fe eucarística na que o Pai nos dá en alimento ao seu Fillo para que co Espírito Santo formemos tamén nós unha única comunidade na que todos somos acollidos e queridos sen distincións.

ACTO PENITENCIAL

Celebrante: *Neste momento de conversión queremos facer tamén referencia a ese Deus Trindade para que acepte as nosas boas obras e perdoe cando o facemos mal ou non facemos o ben que debemos facer:*

Monitor/a

✓ Polas veces seguimos presentando a Deus na trindade de xuíz, vingativo e cruel

PAI, TEN PIEDADE DE NÓS

✓ Polas veces que nos falta ilusión e confianza, e convertémonos en cristiáns cheos de rutinas

FILLO, TEN PIEDADE DE NÓS

✓ Polas veces que na nosa vida non sentimos a Deus a nosa beira, e deixámonos encamiñar polo ter, polo poder ou polo prestixio

ESPÍRITO SANTO, TEN PIEDADE DE NÓS

Celebrante: *Deus todopoderoso teña piedade de nós, dos que teñen un lugar nas nosas vidas, dos que lles costa crer e dos que non atopan a Deus. A todos nos conceda o perdón e nos leve á vida eterna. AMÉN*

ORACIÓN PROPIA DO DÍA

Celebrante: *Rematamos a primeira parte da celebración presentando no silencio o que rebule no noso interior. Pedimos hoxe que saibamos ser e dar bo exemplo de Deus na nosa comunidade.*

(silenzo)

Celebrante:

Deus Pai, ti revelaches ao xénero humano o admirable misterio do teu ser, enviando ao teu Fillo, Palabra da verdade, e ao Espírito da santidad, concédenos profesar a nosa fe en Ti e recoñecer a túa gloria na unidade das tres persoas. Pedímoscho por Cristo, Noso Señor. Amén.

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *A lectura da carta de Paulo que agora imos escoitar lémbra-nos que o noso corazón está cheo de Deus.*

No Evanxeo Xesús fala do que o une ao Pai e ao Espírito. Todo o que é o Pai está nel, e o Espírito alenta en nós para sentilo, vivilo e facernos a nós partícipes deste amar de Deus. Escoitamos.

Leccionario I-C páx 292 **Rom 5, 1-5** **LECTURA**

LECTURA DA CARTA DE SAN PAULO AOS ROMANOS

Irmáns e irmás:

xustificamos pola fe, estamos en paz con Deus, por medio do noso Señor Xesús Cristo. Por El temos tamén entrada a esta graza na que nos mantemos; e estamos

orgullosos coa esperanza de lograr a gloria de Deus. E non só isto, senón que estamos orgullosos nas tribulacións, sabendo que a tribulación enxendra a paciencia, a paciencia proba a fidelidade e a fidelidade produce a esperanza. E a esperanza non falla, porque o amor de Deus vértese nos nosos corazóns mediante o Espírito Santo, que se nos deu.

Palabra do Señor

🎵 *nº 41 Quen nos vai separar de Ti* **SALMO**



(en pé) *Leccionario I C* páx 293 Xn 16, 12-15 **EVANXEO**

PROCLAMACIÓN DO SANTO EVANXEO SEGUNDO XOÁN

Daquela díxolles Xesús aos seus discípulos:

- Aínda teño moitas cousas que vos dicir, pero non podeades con elas agora. Cando veña El, o Espírito da Verdade, havos encamiñar á verdade plena, pois non vos falará pola súa conta, senón que vos dirá o que escoitou e anunciaravos o que ha de pasar. El hame glorificar, pois recibirá do meu e interpretarávolo. Todo o que ten o Pai é meu, por iso díxenvos que recibirá do meu e volo interpretará a vós.

Palabra do Señor

(sentad@s) gardamos uns instantes de silencio para acoller a palabra no corazón



*Hoxe cremos en Deus Trindade,
e cremos na paz para sementala e calar aos violentos que
non teñen valor para ser tolerantes e respectuosos con
quen vive e pensa diferente, nas terras de Gaza e
Palestina onde deu a vida o mesmo Xesús..*

*Hoxe cremos en Deus Trindade,
e cremos na tenrura para agarimar e estar á beira das
mulleres que sofren violencia de xénero.*

*Hoxe cremos en Deus Trindade,
e cremos na acollida para cos refuxiados erguer pontes
en lugar de muros facendo do mundo un fogar en
irmandade.*

*Hoxe cremos en Deus Trindade,
e cremos que está con nós á hora de ter preocupación
ecolóxica porque nas nosas mans está o coidado e a
responsabilidade con esta terra e esta natureza que nos
rodea.*

*Hoxe cremos en Deus Trindade,
e está con nós na responsabilidade de coidarnos e coidar
aos demais compartindo o camiño de ser igrexa.*

*Hoxe cremos en Deus Trindade,
e está no medio da nosa comunidade parroquial porque
nos di “eu estarei con vós ata a fin do mundo”.*

PROFESIÓN DA FE

Celebrante *Deixémonos alumar pola luz da fe que
recibimos no bautismo e profesemos a nosa fe no
Deus-Trindade de persoas, respostamos dicindo*

♪ *Creo, Señor, pero aumenta a miña fe*

Monitor/a:

Credes en Deus PAI-NAI,
*que se nos quixo facer cercano e que quere formar parte
na nosa historia?*

♪ *Creo, Señor, pero aumenta a miña fe*

Credes en Deus FILLO, Xesucristo,
*que nos envía a anunciar o evanxeo no nome do Deus
amor que se fai en comunidade?*

♪ *Creo, Señor, pero aumenta a miña fe*

Credes en Deus ESPÍRITO SANTO,
*que vive en nós alentándonos na construción dun mundo
que sexa de novo “á imaxe e semellanza de Deus”?*

♪ *Creo, Señor, pero aumenta a miña fe*

Credes na IGREXA, COMUNIDADE,
*que se descubre, á imaxe de Deus, cimentada no afecto
e anunciadora dun Deus capaz de encher de amor o noso
corazón?*

♪ *Creo, Señor, pero aumenta a miña fe*

ORACIÓN UNIVERSAL

Celebrante: *Movidos polo Espírito que habita en nós, coa intercesión do Fillo, oremos ao Pai dicindo:*

Señor fainos comunidade

Monitor/a

- ✓ Señor, necesitamos unha Igrexa crible para non caer na tentación da intolerancia, que impide anunciarte como Deus de amor e comunión. Axúdanos
- ✓ Señor, necesitamos unhas parroquias que sexan lugar de encontro, de compartir experiencias, de traballo solidario, vivindo a fe. Axúdanos
- ✓ Señor, necesitamos darnos conta do importante que é aportar o noso esforzo para que medre a paz e o ben común. Axúdanos
- ✓ Señor, necesitamos ser un mellor exemplo para as persoas que te buscan e non te atopan porque os nosos feitos non nos fan cribles. Axúdanos
- ✓ Señor, necesitamos esperanza e atrevemento para non contentarnos con moito do que pasa ao noso redor. Axúdanos

Celebrante: *Señor, dende o corazón do mundo queremos chegar ao teu corazón. Fainos comunidade de crentes que se aventura no teu camiño e na túa vida facendo evanxeo por sempre eternamente. Amén*

3.- OS SIGNOS DA COMUNIÓN CON DEUS E COA COMUNIDADE

NOSO PAI

Celebrante: *Con esta oración, Xesús mostrounos un Deus que nos quere e se preocupa por nós, un Deus Pai e Nai atento ao que lle dicimos de corazón.*

Non caíamos en rutinas repetitivas, senón que sintamos de verdade, en Espírito, o que dicimos agora en oración:

NOSO PAI ...



SIGNO DA PAZ

Celebrante: *Agora o signo da paz quere mostrar que todos formamos unha soa comunidade nos sentimentos que nos transmite a fe. Aínda que non poidamos chegar a Gaza e Palestina, que o noso corazón transmita esa paz e esa fe que vivimos en comunidade. Fagámonos cribles.*

🎵 **Fagamos a paz irmáns**

COMUÑÓN

Celebrante: *Deus Pai convídanos a compartir o pan da vida eterna en comunidade.*

Xesús faise presente no medio de nós como irmán que dá vida.

O Espírito alenta amor en cada un de nós para sermos e darmos exemplo do Evanxeo.

Ditosos nós que hoxe somos así convidados a compartir este pan do Señor.

Señor, eu non son merecente de que entres no meu fogar, mais unha palabra túa abonda para me salvar

🎵 **nº 43** **Non vou so**

4.- AVISOS E DESPEDIDA

ORACIÓN FINAL

Celebrante:

Señor noso Deus,
que a nosa fe en Ti,
comunidade de persoas,
nos consiga a salvación,
pois animados polo Espírito Santo
queremos facer noso o camiño de Xesús, teu Fillo,
para chegarmos a participar do teu corazón de Pai,
resucitados para sempre eternamente. Amén

Retomamos hoxe na liturxia o tempo ordinario.

Facémolo tratando de comprender a ese Deus que cada día nos manifesta o seu amor no camiño da nosa vida.

Saibamos levar ao día a día a presenza dese Deus Comunidade que quere que todos participemos con El na construción do Reino.

Avísase das misas (ver folla do mes)

***Que teñamos un bo día, unha boa semana,
e o Señor nos bendiga,† nos garde de todo mal
e nos leve ao seu fogar de vida eterna. Amén***

